



উপজেলা পরিক্রমা

কালীগঞ্জ

কালীগঞ্জ (গাজীপুর), ২৪ জানুয়ারী (সংবাদদাতা)।— গাজীপুর জেলার ৫টি উপজেলার অন্যতম উপজেলা কালীগঞ্জ। কালীগঞ্জ উপজেলার আয়তন ৭৩ বর্গমাইল। লোকসংখ্যা ১ লাখ ৬৮ হাজার ৫শ' ৮৪ জন। তার মধ্যে, পুরুষ ৮৮ হাজার ২শ' ১৯ জন, মহিলা ৮০ হাজার ৩শ' ৬৭ জন। এ উপজেলায় ৭টি ইউনিয়ন, ৯৭টি মৌজা ১৩৪টি গ্রাম রয়েছে। এখানকার মোট জনসংখ্যার সিংহভাগ লোক কৃষিজীবী এবং এদের জীবনযাত্রার মান দারিদ্র্যসীমার নিচে।

যোগাযোগ ব্যবস্থা

কালীগঞ্জ উপজেলার যোগাযোগ ব্যবস্থা অতীত কাল থেকেই দুর্গম। আজো জেলা সদরের সাথে সঠিক যোগাযোগ ব্যবস্থা গড়ে উঠেনি এবং উপজেলা সদরের সাথে গ্রামগুলোর যোগাযোগ ব্যবস্থা আরো নাজুক। ফলে আজো উপজেলাবাসী যাতায়াতে দুর্ভোগের শিকার হচ্ছে। জিয়া সড়ক, স্বপন সড়ক, গাজীপুর নারগানা সড়কসহ অন্যান্য গুরুত্বপূর্ণ সড়কগুলোর পাকা করা অপরিহার্য।

কৃষি

উপজেলার ৮৫ ভাগেরও বেশী লোক কৃষিজীবী। মোট জমির পরিমাণ ৩৬ হাজার ৯শ' ২০ একর। এর মধ্যে আবাদি জমির পরিমাণ ৩৪ হাজার ৭শ' ৬০ একর এবং অনাবাদি জমির পরিমাণ ২ হাজার ১শ' ৬০ একর। জমির প্রকারভেদে কালীগঞ্জ উপজেলায় একফসলী, দোফসলী, তেফসলী শস্যের আবাদ হয়ে থাকে। কৃষি পণ্যের মধ্যে ধান, পাট, ডাল, পিঁয়াজ ও মরিচই প্রধান।

শিক্ষা ব্যবস্থা

কালীগঞ্জ উপজেলার মোট জনসংখ্যার ৩৫% শিক্ষিত। এ উপজেলায় ২টি মহাবিদ্যালয়, ১টি আলিয়া মাদ্রাসা, ২৩টি উচ্চ বিদ্যালয় (১৮টি বালক ৫টি বালিকা), ৭৪টি সরকারী, ১২টি বেসরকারী প্রাথমিক বিদ্যালয় এবং ৩টি সিনিয়র, ৪টি জুনিয়র, ৪টি এতিমখানা ও ৩১২টি ফোরকানিয়া মাদ্রাসা রয়েছে। প্রয়োজনীয় সরকারী অনুদানের অভাবে শিক্ষা প্রতিষ্ঠানগুলোর অবস্থা শোচনীয়।

চিকিৎসা

কালীগঞ্জ উপজেলাবাসীর চিকিৎসার জন্য ১টি স্বাস্থ্য কমপ্লেক্স, ১টি বেডক্রস হাসপাতাল ও ১টি দাতব্যচিকিৎসালয় আছে। ৩১ শয্যাবিশিষ্ট স্বাস্থ্য কমপ্লেক্সে পয়োঃপ্রণালী থেকে শুরু করে পানি সরবরাহ পর্যন্ত কোন কিছুই সঠিক ব্যবস্থা নেই। এখনো সদর স্বাস্থ্য কমপ্লেক্সে রোগী ভর্তি করার কোন ব্যবস্থা কর্তৃপক্ষ করতে পারেনি। ফলে রোগীদের নিয়ে ঢাকাসহ বিভিন্ন স্থানে ছুটতে হয় চিকিৎসার আশায়।

টেলিফোন

কালীগঞ্জে প্রস্তাবিত টেলিফোন একচেঞ্জ স্থাপিত না হওয়ায় জেলা সদর গাজীপুরের সাথেও টেলিফোন যোগাযোগ গড়ে উঠেনি। ৩৫ মাইল বিশিষ্ট একটি সিবি রোডের মাধ্যমে ঘোড়াশাল দিয়ে ঢাকার সাথে টেলিফোনে যোগাযোগ করতে দু'আড়াই ঘণ্টারও বেশী সময় লাগে। কালীগঞ্জে একচেঞ্জ নির্মিত না হওয়ায় উপজেলাবাসী দীর্ঘদিন ধরে টেলিফোন যোগাযোগেও দুর্ভোগ পোহাচ্ছেন।

GRAND TOTAL FOR